


# Filipino

## Unang Markahan – Modyul 7: Pangwakas na Gawain sa Panitikang Mediterranean



**Filipino – Ikasampung Baitang**  
**Alternative Delivery Mode**  
**Unang Markahan (Panitikang Mediterranean) –**  
**Modyul 7: Pangwakas na Gawain sa Panitikang Mediterranean**  
**Unang Edisyon, 2020**

Isinasaad sa Batas Republika 8293, Seksiyon 176 na: Hindi maaaring magkaroon ng karapatang-sipi sa anomang akda ang Pamahalaan ng Pilipinas. Gayonpaman, kailangan muna ang pahintulot ng ahensiya o tanggapan ng pamahalaan na naghanda ng akda kung ito ay pagkakakitaan. Kabilang sa mga maaaring gawin ng nasabing ahensiya o tanggapan ay ang pagtakda ng kaukulang bayad.

Ang mga akda (kuwento, seleksiyon, tula, awit, larawan, ngalan ng produkto o *brand name*, tatak o *trademark*, palabas sa telebisyon, pelikula, atbp.) na ginamit sa modyul na ito ay nagtataglay ng karapatang-ari. Pinagsumikapang matunton ang mga ito upang makuha ang pahintulot sa paggamit ng materyal. Hindi inaangkin ng mga tagapaglathala at mga may-akda ang karapatang-aring iyon. Ang anomang gamit maliban sa modyul na ito ay kinakailangan ng pahintulot mula sa mga orihinal na may-akda ng mga ito.

Walang anomang parte ng materyal na ito ang maaaring kopyahin o ilimbag sa anomang paraan nang walang pahintulot sa Kagawaran.

Inilathala ng Kagawaran ng Edukasyon  
Kalihim: Leonor Magtolis Briones  
Pangalawang Kalihim: Diosdado M. San Antonio

Bumuo sa Pagsusulat ng Modyul		
<b>Manunulat:</b>	Alvin D. Mangaoang	
<b>Editor:</b>	Luisito V. Libatique	Belen C. Aquino
	Cesar B. Avecilla	
<b>Tagasuri:</b>	Arabella May Z. Soniega	Virgilio C. Boado
	Gina A. Amoyen	Editha T. Giron
	Alejo R. De Sesto	
<b>Tagaguhit:</b>	Rodel R. Rimando	Ernesto F. Ramos Jr.
<b>Tagalapat:</b>	Alvin D. Mangaoang	
<b>Tagapamahala:</b>	Tolentino G. Aquino	Atty. Donato D. Balderas Jr.
	Arlene A. Niro	German E. Flora
	Gina A. Amoyen	Virgilio C. Boado
	Editha T. Giron	Alejo R. De Sesto

Inilimbag sa Pilipinas ng \_\_\_\_\_

**Department of Education – Region I**

Office Address: Flores St., Catbangan, City of San Fernando, La Union

Telefax: (072) 682-2324; (072) 607-8137

E-mail Address: region1@deped.gov.ph

## **Filipino**

### **Unang Markahan – Modyul 7: Pangwakas na Gawain sa Panitikang Mediterranean**

# Paunang Salita

## Para sa Tagapagdaloy:

Malugod na pagtanggap sa asignaturang Filipino 10 ng Alternative Delivery Mode (ADM) Modyul para sa araling Panitikang Mediterranean!

Ang modyul na ito ay pinagtulungang dinisenyo, nilinang at sinuri ng mga edukador mula sa pampubliko at pampribadong institusyon upang gabayan ka, gurong tagapagdaloy at upang matulungang makamit ng mag-aaral ang pamantayang itinakda ng Kurikulum ng K to12 habang kanilang pinanagumpayan ang pansarili, panlipunan at pang-ekonomikong hamon sa pag-aaral.

Ang tulong-aral na ito ay inaasahang maiuugnay ang mag-aaral sa mapatnubay at malayang pagkatuto ng mga gawain ayon sa kanilang kakayahan, bilis at oras. Naglalayon din itong matulungan ang mag-aaral upang makamit ang mga kasanayang hinihingi ng ika-21 siglo habang isinasaalang-alang ang kanilang mga pangangailangan at kalagayan.

Bilang karagdagan sa materyal ng pangunahing teksto, makikita ninyo ang kahong ito sa pinakakatawan ng modyul:



### ***Mga Tala para sa Guro***

Ito'y naglalaman ng mga paalala, panulong o estratehiyang magagamit sa paggabay sa mag-aaral.

Bilang tagapagdaloy, inaasahang bibigyan mo ng paunang kaalaman ang mga mag-aaral kung paano gamitin ang modyul na ito. Kinakailangan ding subaybayan at itala ang pag-unlad nila habang hinahayaan silang pamahalaan ang kanilang sariling pagkatuto. Bukod dito, inaasahan mula sa iyo na higit pang hikayatin at gabayan ang mag-aaral habang isinasagawa ang mga gawaing nakapaloob sa modyul.

## Para sa mag-aaral:

Malugod na pagtanggap sa Filipino 10 ng Alternative Delivery Mode (ADM) Modyul ukol sa Panitikang Mediterranean!

Ang kamay ay madalas gamiting simbolo ng kakayahan, aksiyon at layunin. Sa pamamagitan ng ating mga kamay tayo ay maaaring matuto, lumikha at magsakatuparan ng gawain. Ang kamay sa tulong-aral na ito ay sumisimbolo na ikaw, bilang isang mag-aaral, ay may angking kakayahang matutuhan ang mga kaugnay na kompetensi at kasanayan. Ang iyong pang-akademikong tagumpay ay nakasalalay sa iyong sarili o sa iyong mga kamay.

Ang modyul na ito ay ginawa bilang tugon sa iyong pangangailangan. Layunin nitong matulungan ka sa iyong pag-aaral habang wala ka sa loob ng silid-aralan. Hangad din nitong madulutan ka ng mga makabuluhang oportunidad sa pagkatuto.

Ang modyul na ito ay may mga bahagi at *icon* na dapat mong maunawaan.



### **Alamin**

Sa bahaging ito, malalaman mo ang mga dapat mong matutuhan sa modyul.



### **Subukin**

Sa pagsusulit na ito, makikita natin kung ano na ang kaalaman mo sa aralin ng modyul. Kung nakuha mo ang lahat ng tamang sagot (100%), maaari mong laktawan ang bahaging ito ng modyul.



### **Balikan**

Ito ay maikling pagsasanay o balik-aral upang matulungan kang maiugnay ang kasalukuyang aralin sa naunang leksyon.



### **Tuklasin**

Sa bahaging ito, ang bagong aralin ay ipakikilala sa iyo sa maraming paraan tulad ng isang kuwento, awitin, tula, pambukas na suliranin, gawain o isang sitwasyon.



### **Suriin**

Sa seksyong ito, bibigyan ka ng maikling pagtalakay sa aralin. Layunin nitong matulungan kang maunawaan ang bagong konsepto at mga kasanayan.



### **Pagyamanin**

Binubuo ito ng mga gawaing para sa malayang pagsasanay upang mapagtibay ang iyong pang-unawa at mga kasanayan sa paksa. Maaari mong iwasto ang mga sagot mo sa pagsasanay gamit ang susi sa pagwawasto sa huling bahagi ng modyul.



### **Isaisip**

Naglalaman ito ng mga katanungan o pupunan ang patlang ng pangungusap o talata upang maproseso kung anong natutuhan mo mula sa aralin.



### **Isagawa**

Ito ay naglalaman ng gawaing makatutulong sa iyo upang maisalin ang bagong kaalaman o kasanayan sa tunay na sitwasyon o realidad ng buhay.



### **Tayahin**

Ito ay gawain na naglalayong matasa o masukat ang antas ng pagkatuto sa pagkamit ng natutuhang kompetensi.



### **Karagdagang Gawain**

Sa bahaging ito, may ibibigay sa iyong panibagong gawain upang pagyamanin ang iyong kaalaman o kasanayan sa natutuhang aralin.



### **Susi sa Pagwawasto**

Naglalaman ito ng mga tamang sagot sa lahat ng mga gawain sa modyul.

Sa katapusan ng modyul na ito, makikita mo rin ang:

### **Sanggunian**

Ito ang talaan ng lahat ng pinagkuhanan sa paglikha o paglinang ng modyul na ito.

Narito ang mga mahahalagang paalala sa paggamit ng modyul na ito:

1. Gamitin ang modyul nang may pag-iingat. Huwag lalagyan ng anomang marka o sulat ang anomang bahagi ng modyul. Gumamit ng hiwalay na papel sa pagsagot sa mga pagsasanay.
2. Huwag kalimutang sagutin ang *Subukin* bago lumipat sa iba pang gawaing napapaloob sa modyul.
3. Basahing mabuti ang mga panuto bago gawin ang bawat pagsasanay.
4. Obserbahan ang katapatan at integridad sa pagsasagawa ng mga gawain at sa pagwawasto ng mga kasagutan.
5. Tapusin ang kasalukuyang gawain bago pumunta sa iba pang pagsasanay.
6. Pakibalik ang modyul na ito sa iyong guro o tagapagdaloy kung tapos nang sagutin lahat ng pagsasanay.

Kung sakaling ikaw ay mahirapang sagutin ang mga gawain sa modyul na ito, huwag mag-aalinlangang konsultahin ang iyong guro o tagapagdaloy. Maaari ka rin humingi ng tulong sa iyong mga magulang, sa nakatatanda mong kapatid o sinoman sa iyong mga kasama sa bahay na maaaring makatulong sa iyo. Laging itanim sa iyong isipang hindi ka nag-iisa.

Umaasa kami, sa pamamagitan ng modyul na ito, makararanas ka ng makahulugang pagkatuto at makakukuha ka ng malalim na pang-unawa sa kaugnay na mga kompetensi. Kaya mo ito!



## Alamin

Binabati kita! Matagumpay mong natapos ang mga aralin sa nakaraang mga araw. Ngayon ay narito na tayo sa panghuling modyul para sa Unang Markahan upang masukat ang iyong kaalaman sa nilalaman nito. Nakahanda ka na ba? Kung nakahanda ka na ay magsimula ka na.

Ang **Modyul 7** ay magsisilbing pangwakas na aralin para sa kabuoan ng Unang Markahan (Panitikang Mediterranean). Ang Dagat ng Mediterranean ay matatagpuan sa pagitan ng timog ng Europe, hilaga ng Africa at timog-kanlurang Asia. Ang salitang “Mediterranean” ay galing sa salitang Latin na “*medius*” at “*terra*” na nangangahulugang “gitnang lupain”. Sinasaklaw ng Mediterranean ang mga sumusunod na mga bansa mula sa tatlong kontinente: Algeria, Egypt, Libya, Morocco, Tunisia na nasa kontinente ng Africa; sa kontinente naman ng Asia nariyan ang Cyprus, Israel, Lebanon, Syria, Turkey at ang *partially recognized* na mga bansang Northern Cyprus at Palestine; at sa kontinente ng Europe naman ay ang Albania, Bosnia at Herzegovina, Croatia, France, Greece, Italy, Malta, Monaco, Montenegro, Slovenia at Spain.

Ang rehiyong ito ay naging kanlungan ng tatlo sa mga pinakaunang sibilisasyon sa mundo – Mesopotamian, Egyptian at Greek. Ang mga Sumerians ng Mesopotamia ang nakatuklas ng sistema ng pagsulat na nagpabago at humubog sa kasaysayan ng mundo. Unti-unting umunlad ang pagsulat mula sa simbolong larawan, simpleng komunikasyon tungo sa likhang-sining at panitikan. Ang panitikan ng Sinaunang Mediterranean ay naging batayan ng iba’t ibang uri ng panitikan sa buong mundo.

Masusuri mo sa araling ito ang epikong Greek na “Troy”, isa sa mga mahahalagang bahagi ng Iliad ni Homer. Makapagbabahagi ka rin ng iyong opinyon o pananaw sa pagbuo ng suring-basa at maibibigay ang kaugnay na mga konsepto ng piling salitang *critique* (panunuri) at simposyum.

### **Mga Pinakamahahalagang Kasanayang Pampagkatuto (MELC)**

1. Naibabahagi ang sariling opinyon o pananaw batay sa napakinggan o nabasa. **(F10PN-Ii-j-68)**
2. Nakabubuo ng isang suring-basa sa alinmang akdang pampanitikang Mediterranean. **(F10PB-Ii-j-69)**
3. Naibibigay ang kaugnay na mga konsepto ng piling salitang *critique* at simposyum. **(F10PT-Ii-j-68)**

Handa ka na ba? Tara na’t tayo ay magsimula na.





## Subukin

*Tayo na't sagutan natin ang paunang pagtatayang susubok sa iyong kahandaan sa ating aralin. Natitiyak kong sabik ka nang isagawa ang unang pagsubok. Simulan mo na.*

### PAUNANG PAGTATAYA


A. Panuto: Basahin at unawain ang sumusunod na mga tanong. Isulat sa iyong sagutang papel ang letra ng tamang sagot.

- \_\_\_\_\_ 1. Alin sa mga sumusunod ang HINDI kabilang sa mga katangiang dapat taglayin ng isang kritiko?
  - A. matapat na kumikilala sa akda
  - B. handang kilalanin ang sarili bilang manunuri
  - C. laging bukas sa pananaw ng pagbabago
  - D. tinitingnan ang negatibong aspekto ng isang akda
- \_\_\_\_\_ 2. Ang mga sumusunod ay tumutukoy sa panunuring pampanitikan MALIBAN SA ISA.
  - A. Ito ay isang pag-aaral, pagtalakay, pagsusuri at pagpapaliwanag sa isang akdang pampanitikan.
  - B. Ito ay malalim na paghihimay sa mga akdang pampanitikan sa pamamagitan ng paglapat ng iba't ibang dulong.
  - C. Ito ay pagtalakay na nagbibigay-buhay at diwa sa isang likhang-sining.
  - D. Ito ay pumapaksa sa pagsasabuhay ng isang akdang pampanitikan sa entablado o iba pang media.
- \_\_\_\_\_ 3. Tumutukoy ito sa kung ano ang nadama at paano naantig ang emosyon ng mambabasa.
  - A. bisa sa isip
  - B. bisa sa damdamin
  - C. bisa sa kaasalan
  - D. bisa sa kalikasan
- \_\_\_\_\_ 4. Ito ay isang okasyon, pagpupulong o panayam kung saan nagtitipon-tipon ang mga kalahok upang talakayin ang isang partikular na paksa.
  - A. komperensya
  - B. simposyum
  - C. seminar
  - D. lahat ng nabanggit
- \_\_\_\_\_ 5. Alin sa mga sumusunod ang HINDI kabilang sa mga batayang konsepto sa paggawa ng simposyum?
  - A. gawing pormal
  - B. kilalanin ang paksa
  - C. maging matalinghaga
  - D. lumahok sa diskusyon
- \_\_\_\_\_ 6. Tumukoy ito sa pagsusuri o rebyu ng binasang teksto o akda.
  - A. suring-pampelikula
  - B. suring-pantelebisyon
  - C. suring-pansocial media
  - D. suring-basa
- \_\_\_\_\_ 7. Alin sa mga sumusunod na bahagi ng isang suring-basa ang sumusuri sa tema, tauhan, tagpuan, balangkas at kultura sa akda?
  - A. pangnilalaman
  - B. pangkaisipan
  - C. panimula
  - D. buod



- \_\_\_\_ 8. Alin sa mga sumusunod na bahagi ng isang suring-basa ang sumusuri sa mga kaisipan at estilo pagkakasulat ng akda?  
 A. pangnilalaman C. panimula  
 B. pangkaisipan D. buod
- \_\_\_\_ 9. Sa isang simposyum, siya ang tagapaglahad ng paksa, tagapatnubay, tagapaglinaw at nagbibigay ng buod.  
 A. open forum C. speaker  
 B. seminar-workshop D. modereytor
- \_\_\_\_ 10. Kapag nakapagsalita na ang lahat sa isang simposyum susundan ito ng \_\_\_\_\_.  
 A. open forum C. round table discussion  
 B. seminar-workshop D. focus group discussion

B. Panuto: Magbigay ng iyong inisyal na kaalaman o konsepto hinggil sa salitang critique at simposyum gamit ang grapikong presentasyon. Gayahin ang pormat sa sagutang papel.



C. Panuto: Basahin at unawaing mabuti ang mga sumusunod na pangungusap. Isulat sa iyong sagutang papel ang FACT kung ang pangungusap ay *Tama* at BLUFF naman kung ito'y *Mali*.

- \_\_\_\_ 1. Hindi tinatablan si Achilles ng kahit anomang sandata maliban sa kaniyang pusod na siyang kaniyang kahinaan.
- \_\_\_\_ 2. Si Chryseis ang dahilan kung bakit sumiklab ang digmaan sa pagitan ng Troy at Greece.
- \_\_\_\_ 3. Si Hector ang nakatalo at nakapaslang kay Achilles sa pamamagitan ng pagpana sa kaniyang sakong.
- \_\_\_\_ 4. Hindi nakiisa ang Thebes sa pakikipagdigma sa Troy dahil wala naman silang rason upang kaawayin sila.
- \_\_\_\_ 5. Hinimok ni Haring Agamemnon ang lahat ng mga lungsod ng Troy upang kalabanin ang Greece.
- \_\_\_\_ 6. Nagtago sa likuran ng mga kawal si Paris nang hamunin niya si Haring Menelaus.
- \_\_\_\_ 7. Nagpanggap na Achilles si Patroclus gamit ang gayak-pandigma nito.

- \_\_\_\_\_ 8. Pinayuhan at tinulungan ni Aphrodite si Paris upang magapi ang mga Greek sa labanan.
- \_\_\_\_\_ 9. Sa sama ng loob ni Achilles, sumugod siya sa kampo ng mga Trojan upang ipaghiganti si Patroclus.
- \_\_\_\_\_ 10. Ipinagluksa ni Haring Priam ng Troy ang kamatayan ng kaniyang anak na si Paris.

*Magaling! Binabati kita at natapos mo ang paunang pagtataya. Huwag kang panghinaan ng loob kung mababa man ang iyong nakuhang marka. Ito ay unang pagsubok pa lamang at natitiyak kong paghuhusayan mo pang lalo ang iba pang gawaing inihanda ko para sa iyo. Kaya naman, ipagpatuloy mo na ang pag-aaral sa ating aralin.*

<b>Aralin</b>  <b>1</b>	<b>Pangwakas na Gawain sa Panitikang Mediterranean</b>  <b>Panunuring Pampanitikan at Simposyum</b>
-------------------------------	---




## **Balikan**

*Ngayon, bago tayo pumunta sa talakayan, magbabalik-tanaw muna tayo sa mga natalakay na akdang pampanitikan ng Mediterranean. Sagutin mo muna ang gawain.*

### **Gawain 1: Impluwensiya ng Panitikang Mediterranean**

Panuto: Itala ang mga impluwensiya ng mga akdang pampanitikan ng Mediterranean sa panitikan, pamumuhay, kaugalian, paniniwala at kultura sa ating bansa at sa buong mundo.



*Binabati kita at naikintal sa iyong isipan ang kaisipan at impluwensiya ng mga akdang pampanitikang iyong napag-aralan. Natunghayan mo ang mahalagang ambag ng panitikang Mediterranean sa pag-unlad ng sarili nating panitikan at maging sa buong mundo.*

Tulad ng isang minahan ang taglay na yaman ng bawat panitikan ng ating binabasa. Mamimina lamang natin nang lubos ang gintong kaisipang taglay nito kung susuriing mabuti ang ating binabasa. Ang kaalamang ito ay higit mo pang mapagayayaman kung magsasagawa ka ng suring-basa sa napiling akda mula sa Mediterranean. Bilang pangwakas na gawain, ikaw ay gagawa ng isang suring-basa ng isang akdang mula sa Mediterranean. Tunghayan ang talakayan sa pagsusuri sa kasunod na pahina. Kung handa ka na, magsimula na.



### **Mga Tala para sa Guro**

Bagaman ang orihinal na inaasahang pagganap ay kinakailangang maging pangkatan at aktuwal ang pagsasama-sama ng mga mag-aaral sa pagbuo ng simposyum, gagawin itong *self-paced* ng modyul na ito. May ibang mga kaparaanan upang maisakatuparan ang kasanayang pampagkatuto. Manatili lamang sa paggabay sa ating mga mag-aaral sa mga bahaging sila'y mahihirapan upang mas maging mainam at interaktibo ang pagkatuto at pagtuturo.



### **Tuklasin**

Sa bahaging ito ng aralin, babasahin, uunawain at susuriin mo ang isang bahagi ng mito o epikong Greek na “Troy”. Ang Troy ay kilalang tagpuan sa epiko ni Homer na “Iliad” kung saan naganap ang Trojan War noong ika-13 siglo BCE na tumagal ng sampung taon dahil sa kagustuhan ni Haring Menelaus na makuhang muli ang kaniyang asawang si Helen na inagaw ni Paris – prinsipe ng Troy. Ang Troy ay isinalaysay sa pamamagitan ng tulang pasalaysay na kilala sa tawag na epiko. Magagamit mo ang akdang ito para sa inaasahang pagganap.

### **Troy**

*Isinalaysay ni J.L. Royo  
Nirebisa ni Alvin D. Mangaoang*

Sa pagsisimula ng labanan sa pagitan ng mga Trojan at Greek, hinikayat ni haring Agamemnon ang lahat ng mga lungsod sa Greece na magpadala ng mga sundalo para makiisa sa gagawing pagsalakay sa Troy. Halos lahat ng lungsod ay tumugon sa kaniyang panawagan maliban lamang sa Thebes na noon ay naniniwalang ang pakikipaglaban sa mga Trojan ay isang kahibangan. Nang marinig ni Haring Agamemnon ang naging pasya ng mga Theban ay agad siyang nagpadala ng mga sundalo sa kanilang lungsod upang ito’y sirain. Kinuha ang kanilang mga ari-arian at ginawang bihag ang ilan sa magagandang dilag sa

kanilang lugar. Kabilang na si Chryseis, isang napakaganda at napakabatang dilag na anak ng isang pari ng Thebes. Matapos na maipagbunyi ng mga Greek ang kanilang tagumpay sa pagwasak ng lungsod ng Thebes ay naging bihag na ni Haring Agamemnon ang dalaga.

Libo-libong mandirigma ang dumating sa Troy, kasama rito ang magiting at ang napakabilis na si Achilles. Sa kanilang pagdating, pinili ng mga sundalong Greek na manatili muna sa baybaying malapit sa Troy para makapaghanda sa gagawing pagsalakay.

Kinagabihan, dumating sa kanilang kampo ang matandang pari na ama ni Chryseis. Hiniling nitong makipag-usap sa hari at sa kaniyang mga nasasakupan. Sa kanilang paghaharap ay nagmakaawa ito sa hari na ibalik ang kaniyang anak, kapalit ng kaniyang mataimtim na dasal na sila ay gabayan ng mga diyos at diyosa upang magtagumpay sa kanilang pakikipaglaban. Ngunit sa halip na siya ay kaawaan ng hari, siya ay tinakot at hinamak.

Nilisan agad ng matanda ang kampo at kinagabihan, sa kaniyang pag-iisa sa dalampasigan ay lumuhod at taimtim na nagdasal sa diyos na si Apollo. Naawa si Apollo sa matanda kaya sa isang iglap ay pinaulanan niya ng pana ang kampo ng mga Greek na naging dahilan ng pagkakaroon nila ng matinding karamdaman.

Nasaksihan lahat ni Achilles ang mga pangyayaring ito, kaya agad niyang tinipon ang mga heneral at sa hari ay nagwikang ang pang-iinsulto at pananakot na ginawa nito sa matanda ay hindi nakabuti, sa halip ito ay nakasama sa kanilang pangkat na ngayo'y nagdurusa sa paghihiganti ng diyos na si Apollo. Dahil dito, inutos ni Achilles sa hari na ibalik na niya ang dalaga sa kaniyang ama.

Galit na galit ang hari sa kaniyang narinig. Bagaman lubos ang kaniyang paniniwala sa kakayahan ni Achilles ay isang paglapastangan ang ginawa nitong pagdidikta sa kaniya at kailanma'y hindi siya susunod sa isang hamak na mandirigma lamang. Ikinasama ng loob ni Achilles ang sagot ng hari kaya agad siyang umalis.

Kinabukasan, mas lalong lumala ang naging kalagayan ng mga sundalong Greek. Ang kanilang mga katawan ay patuloy na nanghina dahil sa matinding karamdamang dumapo sa kanila. Dahil dito, ipinasya ng hari na ihatid na si Chryseis sa kaniyang ama at ang lahat ng babaeng ibinilanggo ng mga sundalo kabilang na ang kay Achilles ay pinakawalan na rin. Nainsulto si Achilles sa ginawang desisyon ng hari kung kaya pinili niyang huwag nang makiisa sa digmaan.

Sa pagbubukang-liwayway, libo-libong mandirigma ang naglaban-laban dahil lamang sa isang babae na kung tawagin ay Helen. Si Helen na asawa ni Haring Menelaus (kapatid ni Haring Agamemnon) na matapos makita ang binatang si Paris ay kaagad na nabihag ang puso at sumama sa binata sa Troy.

Walang takot na sinalubong ng mga Trojan sa pamumuno ni Hector ang mga sundalong Greek. Si Hector ay kilala sa kaniyang katapangan at pagiging



mabagsik na mandirigma ng Troy. Siya ay kapatid ni Paris na mahilig sa magagandang damit at pakikipag-ulayaw sa magagandang babae.

Sinisi ni Hector si Paris dahil sa kaniyang pang-aagaw kay Helen kay Haring Menelaus, masisira ang kanilang magandang siyudad, mamamatay ang libo-libo nilang mandirigma at magiging bilanggo ang mga kababaihan at kabataan sa kanilang lugar. Sa tindi ng galit ni Hector kay Paris, hiniling niyang hindi na lamang sana siya isinilang para hindi maranasan ng kanilang nasasakupan ang lahat ng mga kaguluhang naangyayari.

Nang marinig ni Paris ang tinuran ng kaniyang kapatid ay agad siyang sumakay sa kaniyang karwahe at buong tapang na hinamon ang pinakamatapang na sundalong Greek na makipaglaban sa kaniya upang hindi na magdusa pa ang lahat.

Narinig ni Haring Menelaus ang kaniyang panawagan at kaagad itong bumaba sa kaniyang karwahe upang labanan ang binata at nagwikang nagagalak siya sapagkat siya mismo ang kikitil sa buhay niya. Dahil sa matinding takot sa sinabi ni Haring Menelaus ay nagtago si Paris sa likuran ng kaniyang pangkat. Sa kabilang banda, hindi magkamayaw ang tawanan ng mga sundalong Greek sa kanilang nasaksihan na nagdulot ng malaking kahihiyan sa mga Trojan.

Sa takot na makaabot sa pandinig ni Helen ang kaniyang ginawa ay kaagad na lumabas si Paris at hinarap si Haring Menelaus. Dahil hindi sanay na makipaglaban si Paris ay hindi niya kinaya ang lakas at galing ng hari. Hinila siya ng hari papunta sa pangkat ng mga sundalong Greek.

Nasaksihan ni Aphrodite – ang diyosa ng pag-ibig, ang nangyari kay Paris kaya agad siyang pumagitna at dinala ang binata kay Helen – ang babaeng pinakamamahal niya.

Nagpatuloy ang digmaan at libo-libong mandirigma na ang ang nangamatay. At hangga't hindi nakikiisa si Achilles sa labanang ito, patuloy na malalagas ang puwersa ng mga sundalong Greek. Pagsapit ng gabi, nagliliwanag ang mga kampo ng mga sugatang sundalo na bagaman pagod na ay patuloy pa rin sa paghahanda.

Isang sundalo ang naglakas-loob na humingi ng tulong kay Achilles ngunit patuloy na nagmatigas ang binata. Dahil dito, naisipan ni Patroclus – kaibigang matalik at pinsan ni Achilles na magpanggap gamit ang kasuotan ng magiting na mandirigma.

Sa kaniyang ginawa, biglang nanumbalik ang lakas ng mga sundalong Greek sa pakikipaglaban sa mga Trojan na noon ay walang takot na humaharap at pumapatay ng mga kalaban. Hanggang sa isang pangyayari ang nagpabago ng lahat, napatay ni Hector si Patroclus na noon ay nagbabalat-kayong si Achilles. Nagbunyi ang prinsipe ng Troy ngunit nang matuklasang hindi pala ito si Achilles ay kaagad na napawi ang kaniyang kaligayahan at nangamba sa maaaring iganti ni Achilles sa kaniya.

Walang mapagsidlan ang galit ni Achilles nang marining ang sinapit ng kaibigan kaya agad siyang naghanda at tinawag si Hector na noon ay masinsinang nakikipag-usap sa kaniyang asawa't mga magulang. At bago niya hinarap si Achilles ay isang matamis na halik ang iniwan niya sa kaniyang anak na iyak nang iyak dahil sa takot sa sasapitin ng ama.


Bago niya hinarap si Achilles ay isang panalangin ang kaniyang inusal kay Zeus. Idinalangin na sana pagdating ng araw ay mas mahigitan pa ng kaniyang anak ang kaniyang galing at tapang upang maipagtanggol niya ang kaniyang ina at sampu ng kaniyang nasasakupan.

Sa kanilang paghaharap, walang panama ang lakas at bilis ni Hector sa lakas ni Achilles. Naglabanan ang dalawa hanggang sa isang iglap ay binawian



ng buhay si Hector. Nakita ng lahat ang nangyari kay Hector. Ikinalungkot ito ng mga Trojan at higit lalo ng kaniyang butihing asawang si Andromache. Nang namatay na ang pinakamagiting na mandirigma ng Troy, malaki ang paniniwala ng mga Greek na sila ay magtatagumpay lalo na't naroon si Achilles na tutulong sa kanila.

Kinagabihan, kinaladkad ni Achilles ang katawan ni Hector sa kanilang kampo. Ipinagluksa ni Haring Priam ng Troy ang pagkamatay ni Hector at natakot sa maaaring sapitin ng kaniyang nasasakupan lalo na't si Hector lamang ang inaasahan ng lugar. Hatinggabi nang nagtungo si Haring Priam kay Achilles at



nagmakaawang kunin ang mga labi ng kaniyang anak at bigyan ng narapat na libing na para sa isang prinsipe. Binigay naman ni Achilles ang katawan ni Hector at sinabihan ang lahat ng mandirigmang Greek na walang magaganap na pag-aatake sa loob ng labindalawang araw bilang respeto sa libing ni Hector.

Makalipas ang panahon, dahil sa hindi mabasag-basag ng mga mandirigma ni Haring Agamemnon ang malakas na depensa ng mga Trojan, naisip ni Odysseus na gumawa ng isang napakalaking kabayong gawa sa kahoy upang ibigay bilang regalo para sa mga Trojan. Tinanggap naman ito ng mga Trojan ngunit ang hindi nila alam, nasa loob ng kabayo ang mga sundalong Greek na pinangungunahan ni Achilles. Nang hatinggabi, habang tahimik na natutulog ang lahat, inatake nina Achilles ang mga kalaban nila at sinunog nila ang lungsod. Pinatay ni Haring Agamemnon si Haring Priam ngunit patagong sinaksak naman ni Chryseis si Agamemnon na siyang dahilan ng kaniyang pagkasawi.

Si Apollo, na diyos ng mga mandirigma ay biglang nagpakita kay Paris at nagpasyang tulungan ang Troy sa kanilang pakikipaglaban. Pinayuhan niya si Paris na lumaban gamit ang pana. Sinabing paulanan niya ng pana ang mga sundalong Greek. Nagdalawang-isip si Paris na patayin ang magiting na si Achilles dahil hindi siya agad-agad namamatay. Ibinabad kasi ng kaniyang ina ang katawan niya maliban sa sakong nito sa ilog Styx.

Isinalaysay ni Apollo na batid ng lahat ng mga diyos na ang kaniyang buhay ay may hangganan dahil sa ginawa niyang pagpili sa kanilang harapan. Ninais niyang sumama sa digmaang ito kapalit ng kaniyang katanyagan at pagkilala sa kaniya bilang isang magiting na mandirigma.

Dahil sa narinig, kaagad na ibinabad ni Paris ang kaniyang mga palaso sa isang lason at saka ipinaulan sa kaniyang mga kalaban. Tinamaan ng isang palaso ang sakong ni Achilles. Nahulog si Achilles sa kaniyang karuwahe at humandusay ang patay na katawan niya sa lupa.

*Maaaring panoorin sa mga link na ito:*

<https://www.youtube.com/watch?v=4Mm-Y-z-QDI>

<https://www.youtube.com/watch?v=6V1D6Sq4oaY&t=337s>

*Naunawaan mo ba ang iyong binasa? Kung oo, mahusay ka! Kung hindi, maaari mmo ring balikan upang mas maunawaan mo pa ito. Ngayon kung lubos mon ang nauunawaan, isagawa mo ang kasunod na gawain.*

## Gawain 2: Pag-unawa sa Binasa

Panuto: Sagutin ang mga sumusunod na tanong.

1. Sino si Achilles? Ano ang malaking tungkulin niya sa digmaan ng Troy?  
\_\_\_\_\_  
\_\_\_\_\_
2. Ano ang dahilan ng pagkakaroon ng labanan sa Troy?  
\_\_\_\_\_  
\_\_\_\_\_
3. Anong uri ng pinuno si Haring Agamemnon? Makatuwiran ba ang ginawa niya sa Thebes?  
\_\_\_\_\_  
\_\_\_\_\_
4. Ilarawan si Paris bilang isang mandirigma. Nararapat bang taglayin ang ganitong katangian ng isang mandirigma?  
\_\_\_\_\_  
\_\_\_\_\_
5. Paghambingin ang katauhan nina Hector at Achilles? Ipaliwanag kung sino sa kanila ang dapat pamarisan at ituring na magiting.  
\_\_\_\_\_  
\_\_\_\_\_

## Gawain 3: Opinyon Ko, Mahalaga!

Panuto: Sagutin ang mga sumusunod na tanong at pahayag.

1. Sino sa mga tauhan ng epikong Troy ang maaaring sumalamin sa iyong katauhan?  
\_\_\_\_\_  
\_\_\_\_\_
2. Sa kabuoan, ano ang nais iparating na mensahe ng epikong Troy?  
\_\_\_\_\_  
\_\_\_\_\_
3. Sa tingin mo, nararapat bang makialam ang mga diyos at diyosa sa awayan ng mga mortal? Bakit?  
\_\_\_\_\_  
\_\_\_\_\_
4. Sa iyong pananaw, paano matatapos ang isang kaguluhan sa pagitan ng magkaalitang mga bansa o kaharian?  
\_\_\_\_\_  
\_\_\_\_\_
5. Mailalarawan ba sa isang akdang pampanitikan ang kultura ng isang bansa? Paano?  
\_\_\_\_\_  
\_\_\_\_\_

*Mahusay! Binabati kita sa matiyaga mong pag-aaral sa mga aralin. Magpatuloy ka lang sa iyong pag-aaral.*





## **Suriin**

*Basahin at unawain mo ang kaugnay na mga konsepto sa panunuring pampanitikan (critique), suring-basa at simposyum upang maisakatuparan mo ang inaasahang pagganap.*

### **Alam mo bang...**

**Panunuring Pampanitikan** ang tawag isang malalim na paghihimay sa mga akdang pampanitikan sa pamamagitan ng paglalapat ng iba't ibang dulog ng kritisismo para sa mabisang pag-unawa sa malikhaing katha ng manunulat?

- Isa itong pag-aaral, pagtalakay, pagsusuri at pagpapaliwanag ng panitikan.
- Ito rin ay isang uri ng pagtatalakay na nagbibigay-buhay at diwa sa isang likhang-sining.
- May iba't ibang paraan kung paano masusuri ang isang akda ito ay ang suring-basa, suring-pampelikula at suring-pantelebisyon. *(Sa pangwakas na gawain natin, gagamitin natin ang suring-basa)*

**Suring-basa** – Ito ay isang pagsusuri o rebyu ng binasang teksto o akda. Ito ay maikling panunuring pampanitikang naglalahad ng sariling kuro-kuro o palagay tungkol sa akda. Layunin nitong mailahad ang mga kaisipang matatagpuan sa isang akda at ang kahalagahan nito.

### **Mga Dapat Tandaan sa Pagsasagawa ng Surig-basa**

1. Ang pagsusuri sa akda ay dapat may uri at katangian ng katalinuhan, seryoso at marubdob na damdamin at ng tapat na mithi sa kalayaan.
2. Alamin kung anong uri ng akdang pampanitikan ang sinusuri.
3. Sa pagsusuri ng anomang akda, kailangang mahusay ang organisasyon o balangkas. Bahagi ito sa disiplina ng pagsusuri.
4. Bago isulat ang suring-basa ng isang akda, gumawa muna ng sinopsis o maikling lagom.
5. Sa pagsusuri ng akda, dapat maging maganda ang paksa, may kalinisan ang wika at organisado ang paglalahad.
6. Ipahayag ang kaisipan sa malinaw at tiyak na paraan.
7. Ang susuriing akda ay kailangang napapanahon, may matibay na kaisahan, makapangyarihan ang paggamit ng wika at may malalim na kaalaman sa teoryang pampatikan.
8. Gumamit ng mga pananalitang matapat.
9. Pahalagahan din ang paraan o estilo ng pagkakasulat.
10. Ang susuriing akda ay kailangang nagpapamalas ng masinop na pag-uugnay ng mga sangkap ng pagsulat.

### **Mga Katangiang Dapat Tanglayin ng isang Kritiko**

1. Matapat sa sarili. Itinuturing ang panunuring pampanitikan bilang sining.
2. Bukas ang pananaw sa mga pagbabagong nagaganap sa panitikan.
3. Iginagalang ang desisyon at posisyon ng ibang mga kritiko.

4. Matapat na kumikilala sa akda bilang isang akdang sumasalamin sa paraan ng pagbuo o konstruksyon.
5. Kailangan may paninindigan ang isang kritiko.

## **Pormat o Balangkas na Gagamitin sa Pagsulat ng Suring-basa**

### **I. Panimula**

- Pamagat – pagkilala sa pamagat ng akda o teksto.
- May-akda – pagkilala sa kung sino ang sumulat o nagsalin ng akda.
- Uri ng panitikan – pagtukoy sa anyo ng panitikang sinulat, sa himig o damdaming taglay nito.
- Bansang pinagmulan – pagkilala sa bansa kung saan naisulat ang akda.
- Layunin ng Akda – pagsusuri sa kahalagahan ng akda at ang layunin nito. Tumutukoy ito sa nais iparating at motibo ng manunulat sa teksto. Mahihinuha ito sa pamamagitan ng uri ng diskursong ginamit sa pagpapahayag. Halimbawa, ito ba'y naglalayong magpakilos o manghikayat, manuligsa, magprotesta, maglarawan, magsalaysay, maglahad ng impormasyon at iba pa.

### **II. Pagsusuring Pangnilalaman**

- Tema o Paksa ng akda – Ito ba'y makabuluhan, napapanahon, makatotohanan at mag-aangat o tutugon sa sensibilidad ng mambabasa? Ang paksa ay sumasagot sa tanong na tungkol saan ang binasa?
- Mga Tauhan sa Akda – Sino-sino ang mga tauhan at ang kanilang mga katangian?
- Tagpuan / Panahon – Kailan naganap? Anong panahon? Binibigyan ng pansin sa panunuring pampanitikan ang kasaysayan.
- Balangkas ng mga Pangyayari – Paano binuo ang balangkas ng akda? Ano ang mensaheng ipinahihiwatig ng kabuoan ng akda? May natutuhan ka ba sa nilalaman ng akda?
- Kulturang Masasalamain sa Akda – May nakikita bang uri ng pamumuhay, paniniwala, kaugalian o kulturang nangibabaw sa akda? Nakaimpluwensiya ba ito sa pananaw ng ibang tao o bansa?

### **III. Pagsusuring Pangkaisipan**

- Mga Kaisipan / Ideang Taglay ng Akda – Ano-ano ang mga kaisipang lumitaw sa akda? Maaari ring salungatin, pabulaanan, mabago o palitan ang mga kaisipang ito.
- Estilo ng Pagkakasulat ng Akda – Epektibo ba ang paraan ng paggamit ng mga salita? Angkop ba sa antas ng pang-unawa ng mga mambabasa ang pagkabuo ng akda? May bisa kaya ang estilo ng pagkakasulat sa nilalaman ng akda?
  - Bisa sa Isip – tumutukoy sa kung paano naiimpluwensiyahan ang pag-iisip o utak.
  - Bisa sa Damdamin – Ano ang nadama at paano natigatig ang emosyon ng mambabasa?

### **IV. Buod**

- Hindi kailangang ibuod nang mahaba ang akda. Ang pagbanggit sa mahahalagang detalye ang bigyang-tuon.

*Magaling! Sana ay nakatulong sa iyo ang talakay para maunawaan ang konsepto ng suring-basa. Bago tayo magpatuloy sa talakayan tungkol sa Simposyum ay isagawa mo muna ang kasunod na gawain.*

#### **Gawain 4: Ito ang Gusto Ko...**

Panuto: Sagutin ang mga sumusunod na tanong at pahayag.

1. Ano ang panunuring pampanitikan?

---

---

2. Magbigay ng isa sa mga dapat taglayin ng isang kritiko at ipaliwanag.

---

---

*Ngayon, nabatid mo na ang ilan sa mga dapat tandaan sa isang suring-basa, ngayon naman ay tutungo tayo sa kahulugan ng simposyum.*

**Simposyum** – Ito ay isang okasyon, pagpupulong, o panayam kung saan nagtitipon-tipon ang mga kalahok para talakayin ang isang partikular na paksa. Ito ay maihahalintulad sa komperensya ngunit mas maliit ang sakop ng simposyum. Sa isang simposyum, karaniwan nang may isa o ilang taong gumaganap bilang pangunahing tagapagsalita. Siya o ilang piling eksperto ang tumatalakay sa paksa o usaping nakapaloob sa simposyum. Pakikinggan naman sila ng mga kalahok, bisita, kapwa eksperto sa paksa o tagasubaybay sa nagaganap na simposyum.

- Ito ay may isang modereytor na:
  - tagapaglahad ng paksa at layunin ng talakayan
  - tagapagpakilala ng mga tagapagsalita
  - tagapatnubay sa kaayusan at daloy ng talakayan
  - tagapaglinaw sa mga tanong at detalye
  - tagapagbigay ng buod ng talakayan
- Isa-isang tatalakayin ng mga tagapagsalita ang paksang ibinigay sa kanila ayon sa itinakdang oras at haba ng pagsasalita.
- Kapag nakapagsalita na ang lahat ng bumubuo sa pangkat, susundan ng lahatang diskusyon o *open forum* kung saan maaaring magtanong ang mga tagapanikig.

#### **Mga Dapat Tandaan sa Pagsasagawa ng Simposyum**

1. Gawing pormal ang simposyum.
2. Kilalalin ang paksa at iba pang kalahok sa simposyum.
3. Maging pamilyar sa mga terminolohiya o jargons.
4. Aktibong lumahok sa diskusyon.
5. Maging malalim at kritikal sa pagsusuri ng tinatalakay.

*Magaling. Natapos mo nang matutuhan ang tungkol sa simposyum gayon din. Sa pagkakatatong ito'y sagutin mo na ang kasunod na gawain.*

#### **Gawain 5: Usap Tayo...**

Panuto: Sagutin ang tanong sa iyong sagutang papel.

1. Ipaliwanag ang katuturan ng simposyum.


---

---

2. Anong mga isyung panlipunang iyong napakinggan sa balita ang nais mong pag-usapan sa isang simposyum at bakit?

---

---



## Pagyamanin

Ang pagiging isang mahusay na pinuno ay tunay na ikinararangal ng isang bansa at kaniyang mga mamamayan. Isang napakalaking hamon ang maging isang marangal na pinuno at maging isang mandirigma sa ikadarakila ng kaniyang mga nasasakupan.

Ngayon, iuugnay naman natin ang mensaheng nakapaloob sa nabasang akda sa iyong sarili at sa lipunang iyong ginagalawan. Sagutin mo pang muli ang kasunod na mga tanong upang mas mapalalim ang iyong pag-unawa.

### Gawain 6: Saliksik Epiko!

Panuto: Magsaliksik at pumili ng epikong natatangi sa iyong lokalidad. Magbahagi ng sariling opinyon o pananaw sa pagkakaiba at pagkakatulad ng epikong ito sa epikong Troy? Punan ang tsart sa ibaba.

Troy	Epikong Lokal: _____
Pagkakaiba:	Pagkakatulad:
Patunay:	Patunay:



## Isaisip

### Gawain 7: Sagutin Natin

Panuto: Sagutin ang mga sumusunod na tanong sa iyong sagutang papel.


1. Paano nakatutulong ang panunuring pampanitikan sa pagpapayaman ng wika at kulturang Filipino?

---

---

---

2. Paano nagiging kapaki-pakinabang ang simposyum sa mabisang pagbabahagi ng kaalaman at impormasyon?



## Isagawa

Upang matiyak mo kung talagang naintindihan ang araling ating tinalakay sa mga nagdaang araw tungkol sa suring-basa at simposyum, isagawa mo ang pangwakas na gawain para sa Unang Markahan.

### Gawain 8: GRASPS

<b>Goal</b>	Makasusulat ng suring-basa ng Epikong Troy upang ito'y maaaring maipresenta sa isang simposyum.
<b>Role</b>	Isang presenter o maglalahad ng isang suring-basa.
<b>Audience</b>	Guro, mga kapwa mag-aaral.
<b>Situation</b>	Ipagpalagay na ikaw ay nasa simposyum at ikaw ay naatasang magsagawa ng suring-basa sa Epikong Troy.
<b>Product</b>	Suring-basa sa Epikong Troy na maipepresenta sa isang simposyum. Maaaring ihayag sa hatirang pangmadla o <i>social media</i> .
<b>Standards</b>	A. Mabisang Panimula..... 10 puntos B. Pagsusuring Pangnilalaman..... 25 puntos C. Pagsusuring Pangkaisipan..... 25 puntos D. Lalim ng Pagsusuri..... 20 puntos E. Buod..... 20 puntos Kabuoan..... 100 puntos

### SURING-BASA SA ISANG AKDANG MEDITERRANEAN

#### I. Panimula

Pamagat: \_\_\_\_\_

May-akda: \_\_\_\_\_

Uri ng panitikan: \_\_\_\_\_

Bansang pinagmulan: \_\_\_\_\_

Layunin ng Akda: \_\_\_\_\_

#### II. Pagsusuring Pangnilalaman

Tema o Paksa ng akda: \_\_\_\_\_

Mga Tauhan sa Akda: \_\_\_\_\_

Tagpuan / Panahon: \_\_\_\_\_

Balangkas ng mga Pangyayari: \_\_\_\_\_

Kulturang Masasalamatin sa Akda: \_\_\_\_\_

#### III. Pagsusuring Pangkaisipan

Mga Kaisipan / Ideang Taglay ng Akda: \_\_\_\_\_

Estilo ng Pagkakasulat ng Akda: \_\_\_\_\_

#### IV. Buod

\_\_\_\_\_



## Tayahin

*Napakahusay mo! Binabati kita sapagkat narito na tayo sa pangwakas na pagtataya. Kaya sagutin mo na ang mga katanungan.*

### PANGWAKAS NA PAGTATAYA

A. Panuto: Basahin at unawain ang sumusunod na katanungan. Piliin ang letra ng tamang sagot.

- \_\_\_\_\_ 1. Ang mga sumusunod ay tumutukoy sa panunuring pampanitikan MALIBAN SA ISA.
  - A. Ito ay pumapaksa sa pagsasabuhay ng isang akdang pampanitikan sa entablado o iba pang media.
  - B. Ito ay isang pag-aaral, pagtalakay, pagsusuri at pagpapaliwanag sa isang akdang pampanitikan.
  - C. Ito ay malalim na paghihimay sa mga akdang pampanitikan sa pamamagitan ng paglapat ng iba't ibang dulong.
  - D. Ito ay pagtalakay na nagbibigay-buhay at diwa sa isang likhang-sining.
- \_\_\_\_\_ 2. Alin sa mga sumusunod ang HINDI kabilang sa mga katangiang dapat taglayin ng isang kritiko?
  - A. matapat na kumikilala sa akda
  - B. tinitignan ang negatibong aspeto ng isang akda
  - C. handang kilalanin ang sarili bilang manunuri
  - D. laging bukas sa pananaw ng pagbabago
- \_\_\_\_\_ 3. Tumukoy ito sa pagsusuri o rebyu ng binasang teksto o akda.

A. suring-pampelikula	C. suring-pansocial media
B. suring-pantelebisyon	D. suring-basa
- \_\_\_\_\_ 4. Tumutukoy ito sa kung ano ang nadama at paano naantig ang emosyon ng mambabasa.

A. bisa sa isip	C. bisa sa kaasalan
B. bisa sa damdamin	D. bisa sa kalikasan
- \_\_\_\_\_ 5. Alin sa mga sumusunod na bahagi ng isang suring-basa ang sumusuri sa tema, tauhan, tagpuan, balangkas at kultura sa akda?


A. pangnilalaman	C. panimula
B. pangkaisipan	D. buod
- \_\_\_\_\_ 6. Alin sa mga sumusunod na bahagi ng isang suring-basa ang sumusuri sa mga kaisipan at estilo pagkakasulat ng akda?

A. pangnilalaman	C. panimula
B. pangkaisipan	D. buod
- \_\_\_\_\_ 7. Ito ay isang okasyon, pagpupulong, o panayam kung saan nagtitipon-tipon ang mga kalahok upang talakayin ang isang partikular na paksa.

A. kumperensya	C. seminar
B. simposyum	D. lahat ng nabanggit

- \_\_\_\_ 8. Alin sa mga sumusunod ang HINDI kabilang sa mga batayang konsepto sa paggawa ng Simposyum?
- A. gawing pormal  
B. kilalanin ang paksa  
C. maging matalinghaga  
D. lumahok sa diskusyon
- \_\_\_\_ 9. Kapag nakapagsalita na ang lahat sa isang simposyum susundan ito ng \_\_\_\_.
- A. open forum  
B. seminar-workshop  
C. round table discussion  
D. focus group discussion
- \_\_\_\_ 10. Sa isang simposyum, siya ang tagapaglahad ng paksa, tagapatnubay, tagapaglinaw at nagbibigay ng buod.
- A. open forum  
B. seminar-workshop  
C. speaker  
D. modereytor

B. Panuto: Magbigay ng mga kauganay na kaalaman o konsepto hinggil sa salitang critique at simposyum gamit ang grapikong presentasyon. Gayahin ang pormat sa sagutang papel.




- C. Panuto: Basahin at unawaing mabuti ang mga sumusunod na pangungusap. Isulat sa patlang bago ang bilang ang FACT kung ang pangungusap ay *Tama* at BLUFF naman kung ito'y *Mali*. Gumamit ng hiwalay na papel para sa iyong sagot.
- \_\_\_\_ 1. Hindi tinatablan si Achilles ng kahit anomang sandata maliban sa kaniyang sakong na siyang kaniyang kahinaan.
- \_\_\_\_ 2. Si Helen ang dahilan kung bakit sumiklab ang digmaan sa pagitan ng Troy at Greece.
- \_\_\_\_ 3. Si Paris ang nakatalo at nakapaslang kay Achilles sa pamamagitan ng pagpana sa kaniyang sakong.
- \_\_\_\_ 4. Nakiisa ang Thebes sa pakikipagdigma sa Troy.
- \_\_\_\_ 5. Hinimok ni Haring Agamemnon ang lahat ng mga lungsod ng Gresya upang kalabanin ang Troy.



- \_\_\_\_\_ 6. Buong tapang na hinarap ni Paris si Haring Menelaus sa labanan.
- \_\_\_\_\_ 7. Nagpanggap na Achilles si Paris gamit ang gayak-pandigma nito.
- \_\_\_\_\_ 8. Pinayuhan at tinulungan ni Apollo si Paris upang magapi ang mga Greek sa labanan.
- \_\_\_\_\_ 9. Sa sama ng loob ni Hector, sumugod siya sa kampo ng mga Trojan upang ipaghiganti si Patroclus.
- \_\_\_\_\_ 10. Ipinagluksa ni Haring Priam ng Troy ang kamatayan ng kaniyang anak na si Hector.



*Magaling! Ang husay mo! Binabati kita sa sipag mong pagsama sa paglalakbay natin sa mga bansang Mediterranean. Batid kong marami ka nang natutuhan sa mga aralin. Natuklasan mo ang kanilang natatanging panitikan maging ang wika at gramatika. Ngayon, papasok na tayo sa susunod na yugto tungo sa mga panitikan ng mga bansang kanluranin o panitikang Anglo-American sa susunod na Markahan – **Ikalawang Markahan: Panitikang Kanluranin.***



## Susi sa Pagwawasto

- A.**
1. A
  2. B
  3. D
  4. B
  5. A
- B.**
6. A
  7. B
  8. D
  9. B
  10. A
- Iba-iba ang sagot*
- C.**
1. FACT
  2. FACT
  3. FACT
  4. BLUFF
  5. FACT
6. BLUFF
  7. BLUFF
  8. FACT
  9. BLUFF
  10. FACT

### PANGWAKAS NA PAGTATAYA

- ISAGAWA**  
Gawain 8: GRASPS
- ISAISIP**  
Gawain 7: Sagutin Natin
- PAGYAMANIN**  
Gawain 6: Saliksik Epiko
- SURIIN**  
Gawain 4: Ito ang Gusto Ko...  
Gawain 5: Usap Tayo...
- TUKLASIN**  
Gawain 2: Pag-unawa sa Binasa  
Gawain 3: Opinyon Ko, Mahalaga!
- BALIKAN**  
Gawain 1: Impluwensiya ng Panitikang Mediterranean
- Iba-iba ang sagot.*
- Iba-iba ang sagot.*
- Iba-iba ang sagot.*
- Iba-iba ang sagot.*
- Iba-iba ang sagot.*

- A.**
1. D
  2. D
  3. B
  4. D
  5. C
- B.**
6. D
  7. A
  8. B
  9. D
  10. A
- Iba-iba ang sagot*
- C.**
1. BLUFF
  2. BLUFF
  3. BLUFF
  4. FACT
  5. BLUFF
6. FACT
  7. FACT
  8. BLUFF
  9. FACT
  10. BLUFF

### PAUNANG PAGTATAYA

## ***Sanggunian***

Locano, D.G., Ipong M.L. at Royo, J.L (2015). *Parola 10*. Valenzuela City: JO-ES Publishing House, Inc. pa. 4-10.

Ambat, V.C., et.al (2015). *Filipino 10 Modyul para sa Mag-aaral*. Pasig City: Vibal Group, Inc. pa. 114-118.

*Kahulugan ng Simposyum*. Nahango noong Mayo 15, 2020 mula sa <https://brainly.ph/question/2009851>.

*Kahulugan at kahalagahan ng Panunuring Pampanitikan: Katangian ng mahusay na Kritiko*. Nahango noong Mayo 15, 2020 mula sa <https://slideshare.net/mobile/karenmfajardo/kahulugan-at-kahalagahan-ng-panunuring-pampanitikan-katangian-ng-isang-mahusay-na-kritiko>

*Trojan War Greek Mythology*. Nahango noong Mayo 15, 2020 mula sa <https://www.youtube.com/watch?v=6V1D6Sq4oaY&t=337s>.

*Achilles ang halos walang kahinaan na Mandirigma sa Trojan War*. Nahango noong Mayo 15, 2020 mula sa <https://www.youtube.com/watch?v=4Mm-Y-z-QDI>

DRAFT  
07212020

**Para sa mga katanungan o puna, sumulat o tumawag sa:**

Department of Education - Bureau of Learning Resources (DepEd-BLR)

Ground Floor, Bonifacio Bldg., DepEd Complex  
Meralco Avenue, Pasig City, Philippines 1600

Telefax: (632) 8634-1072; 8634-1054; 8631-4985

Email Address: [blr.lrqad@deped.gov.ph](mailto:blr.lrqad@deped.gov.ph) \* [blr.lrpd@deped.gov.ph](mailto:blr.lrpd@deped.gov.ph)